



28

ORATIO

HABITA IN ACADEMIA BONARUM

LITERARUM HISPALENSIS

A DOMINO

MARTINO DE ULLOA,

EIUS PRÆFECTO

PRO GRATIARUM ACTIONE,

ET STUDIO LATINÆ

ERUDITIONIS PROMOVENDO

DIE XI MAI

ANNO MDCCLXXXI.



Hispani : ex Officina Emman. Nicolai Vazquez,
& Francisci Hidalgo.

THE
 UNIVERSITY OF
 CHICAGO
 LIBRARY
 1000
 UNIVERSITY OF CHICAGO
 LIBRARY
 1000
 UNIVERSITY OF CHICAGO
 LIBRARY
 1000



THE UNIVERSITY OF CHICAGO
 LIBRARY



TRANSACTO iam temporis spatio,
 quo huius perillustriſ Academiae Præ-
 feſtura iuxta leges nobis conſtitutas cir-
 cumſcripta eſt, (ampliſſimi Viri, & ſa-
 cri Minervæ Beticæ Adminiſtri) iterum
 beneficentiæ vestræ collatis in id ſuffra-
 giis illam mihi committendam eſſe pla-
 cuit: & licet ego, cum me & viribus &
 ingenio tanto oneri ſubeundo imparem,
 & plurimis aliis negotiis implicatum mi-
 nus aptum ad muneris iſtius curas, ſoli-
 citudines, ac labores ſuſtinendos iudica-
 rem, aliquandiu illud humeris meis im-
 ponendum fuerim reſuſtatus, ne aut de-
 biti erga eandem Academiam obſequii
 minimè præſtiti, aut ingrati animi erga
 vos notâ inurerer, lubens ultrò ſuſcepi,
 & venerationis, & ſubmiſſionis ſpec-
 imen daturus; eâ certe ſpe, atque con-
 fidentiâ ductus, & vos eâ, quâ hucusque,
 mirâ conſtantiâ, indefeſſo ſtudio, alacri
 ani-

IV

animo , & communi consensu muneri ipsi implendo opem præstituros esse , & veniam , si in aliquo (invitus equidem) defecero , benignè impertituros. Ne erga accepti beneficii diu immemor esse videar , vobis maximas rependere gratias statim constitui , tum pro eâ , quâ me prosecuti estis humanitate , tum pro præteriti anni bene partis laboribus , quibus hanc nostram Academiam , & instituti sui implementum pro viribus sustinere curastis , mihiq; in id etiam incumbenti , prout muneris ratio exigebat , auxiliis vestris , consiliis , ac vigiliis suppetias tulistis.

Non equidem tanta animo adest fiducia , ut existimem debito in hoc contracto posse me pro dignitate ; & pro merito satisfacere ; neque enim imbecillitas ingenii , & verborum inopia aptitudinem præstant ipsi penitus exsolvendo , aut intimis affectibus satis abundèque explicandis. Hinc nil mîrum , si ad aras benevolentiae vestrae supplex advolutus ipsam deprecet , ut gratitudinis meae testimonium aestimet , quod operibus vadimonium

nium præstantibus firmum; verum quæ
 esse apparuerit, etiamsi inepto eloquio
 expositum exile nimis, & imbecillum vi-
 deatur. Nec item, si eâdem benevolentia
 duce, & facem mihi præferente, mentis
 vestræ obtutui conspicienda, & oppor-
 tunâ consideratione pensitanda ea omnia
 proponam, quæ ipso præterito anno ex-
 cogitata, & executioni mandata fuerunt,
 ut Academiæ maiori stabilitati, & perpe-
 tuitati consuleretur; ut ipsius fundamen-
 tis firmitus & securius stabiliendis opera
 impenderetur; item ut publicam lucem
 aspicerent ea studiorum, ac vigiliarum
 strarum præcipua monumenta, quæ
 digna tali honore visa fuissent, & Insti-
 tuto responderent. Nec defuit constanter
 adhibita sollicitudo, ut quisque nostrum
 labori se accingens vectigal debitum Rei-
 publicæ exsolvere quotannis curaret.

Non equidem hæc omnia in optatum
 finem perducere licuit. Ipsi attingendo
 gravia obstiterunt impedimenta, quibus
 superandis adhibita diligentia satis esse
 non potuit. In quibusdam præsens obfuit
 rerum status; in aliis maior operum per-

VI

fectio, quæ in publicum prodenda essent
 sedulo intenta, & prout oportet exqui-
 sita; in aliis denique peculiare cuiusque
 nostrum curæ, & additæ ministeriis,
 quibus fungitur, obligationes, queis ex-
 plendis tempus, & operam impende-
 re necessum fuit. Nihilominus constans
 & indeficiens vestri omnium amor, cui
 cordi est opus hoc mente conceptum, &
 publico totius Hispaniæ bono, honori,
 atque utilitati, præcipuè autem huius
 nostræ inclitæ Civitatis Hispalensis na-
 tum, & felicibus auspiciis Regiæ protec-
 tionis consecratum, scientiarumque om-
 nium studio eruditionis variæ flosculis
 ornando & extollendo penitus dicatum
 totis viribus ac nervis sustinere, ita in id
 intendere visus est, ut post triginta suæ
 primævæ originis annos, nec statutis
 hebdomadariis diebus Academicus con-
 cursus, nec solitæ lectiones deficerent,
 quibus & scopum attingere, & proposi-
 to satisfactum iri posset.

Reliquum ergo erit, ut nos operi
 ipsi perficiendo, atque consummando no-
 vis & validioribus conatibus incumben-
 tes,

tēs, & diligentiam & studium prout vires,
& facultates suppetant, applicemus. Nec
enim ignotum est, quam pateat Institut
ti Academici nostri longe lateque diffusa
disceptatio, atque litteraria palæstra,
quâ vera equidem Enciclopædia, &
Scientiarum omnium disciplina compre
henditur.

Cum igitur talis, tantaque nobis ex
ipsius Instituti visceribus, illud omnino
implendi adsit obligatio, mihi nunc li
ceat vestri omnium judicio perpenden
dum exponere, non minimam in hoc
partem sortiri Latini sermonis elegan
tiam, venustatemque, & puriorem au
rei sæculi nitorem, vetustate quidem
collapsam, & Neotericorum incuriâ
summè depressam in pristinum statum
reponere, & restituere. Quid enim
Bonarum Litterarum Professoribus ma
gis conveniens esse videatur, quam si
Latinam Linguam in dies propere defi
cientem, ac in ima subsellia devolutam,
sublevare, erigere, & natalibus honori
bus restituere? Multæ equidem adsunt
rationes, quibus hoc satis superque pos
set

VIII

set commendari, nec vobis, nec aliis
 eruditione præstantibus viris incognitæ.
 ; Quid ergo memorem ipsam scientiarum
 omnium extitisse ianuam, quâ nobis da-
 tum illarum penetralia ingredi, & mys-
 tēriis sacris initiari? ; Quid toto Orbe ter-
 rarum, quo Romanorum imperium, &
 dominatio portendebatur, eam veneratio-
 ni, & cultui habitam, communique
 omnium nationum, gentiumque usui
 consecratam? ; Quid ab Ecclesiâ Romanâ
 ad Sacrarum Scripturarum arcana custo-
 dienda, & fidelibus propinanda; cul-
 tumque Deo Optimo Maximo persolven-
 dum fuisse præpositam, præcipuoque
 honore decoratam? ; Quid ipsam fuisse
Sapientium cognomine insignitam, eò
 quod præclari ubique Scriptores tam Sa-
 cri, quam profani Latine eloqui; & sup-
 sensus aperire, atque aliorum captui per-
 cipiendos traicere consuevere? ; Quid
 denique ipsius concinnitatem, leporem,
 gravitatem, quin dicam maiestatem,
 quæ verè illam primævam Populi Româ-
 ni totius orbis victricem redolere quo-
 dammodo videtur?

Non

IX

Non tamen mihi silentio erit prætereundum ipsam Latinam Linguam Hispanæ nostræ matrem, veramque nutricem extitisse, & apud antiquos Hispaniæ populos primarium locum, & honorem obtinuisse, præsertim apud Turdetanos nostros, & alios Bæticæ incolas; ut enim Strabo libro tertio testatur: „ Turdetani,
 „ maximè qui ad Bætiam sunt, planè Romanos mores assumpserunt ne sermonis quidem vernaculi memores, ac
 „ plerique facti sunt Latini, & Colonos acceperunt Romanos; parumque abest,
 „ quin omnino Romani sint facti. Hinc ergo est, quod recta ratio, debita veneratio, & honesta gratitudo à nobis exigant, ut tale ipsi obsequium, cultusque reddatur, qualis à parentibus, & maioribus nostris exhibitus esse dignoscitur.

Sed ut hæc omnia clariori luce perfundantur, faciliusque innotescant, non abs re erit, vobis equidem annuentibus, ipsius Latinæ Linguae ortum, progressus, vicissitudines, præsentemque statum, qua possim brevitate, & ordine expedire, atque enarrare. Hæc ergo cum

ipsò Populo Romano enata prîma incunabula intra Urbis mœnia , & angustos tunc temporis dominationis fines sortita fuit , plurima vocabula ex finitimarum gentium dialectis sibi accomodans , Italicis nempè Hetruscâ , Tusculanâ , Lanuvinâ , Prænestinâ , Formianâ , Tarracînâ & Marsâ ; itemque ex Aeolicâ , quâ Græci extrema Italiæ Orientem versus habitantes utebantur. Sed cum apud rudem tunc Populum , multosque per annos agris tantum colendis , bellicisque expeditionibus peragendis penitus intentum , scientiarumque , & artium imperitiâ laborantem versaretur , & enutrita fuisset , nil mirum ipsam parem ruditatem , & asperitatem contraxisse , indeque incultam , valde esterilem , & ieiunam fuisse existimatam ; cum notum sit , idiomata iis tantum rebus explicandis efformari , quarum species in usu sint apud cives , quibus illa deserviunt.

Hujus antiquæ Romanæ elocutionis testimonia contemplari licet in vetustis Legum Duodecim Tabularum fragmentis & in aliis , quorum mentio exstat apud

M.

M. Varionem, M. Verrium Flaccum,
 Sex. Pompeium Festum. A. Gellium, ex
 antiquis, & apud Barnabam Brisonium,
 Dionisium & Jacobum Cothofredum,
 Franciscum Hotomannum, & Janum
 Vincentium Gravinam ex recentioribus,
 & ex iis unum tantum adducere lubet,
 quo ipsius speciem clarius queat appa-
 rere, & quô ea statuuntur, quæ in civi-
 libus causis circa modum, tempus, &
 reliqua in ius vocando servanda, præ-
 scripta sunt, & his vocibus concepta.

- „ Si in ius vocat atque eat.
- „ Ni it, an testaminor: igitur em capito.
- „ Si calvitur, pedemve struit, manum
 „ endo iacito.
- „ Si morbus, ævitasve vitium escit,
- „ qui in ius vocabit, iumentum dato: si
 „ nolet, arceram ne sternito.
- „ Assiduo vindex assiduus esto: proleta-
 „ rio cuique volet vindex esto.
- „ Rem uti pacunt orato.
- „ Ni ita pacunt: in comitio, aut in
 „ foro ante meridiem causam conscito,
 „ cum perorant ambo præsentēs: post
 „ meridiem præsentem stitem addicito.
- „ Sol

„ Sol occasus suprema tempestas esto.

Sed postquam Romanæ Reipublicæ, tot bellis feliciter gestis, maiestatem augere, imperium longè latèque diffundere, ac propagare; populos tam intra, quam extra Italiam subigere, ditionique suæ adiacere contigit, hincque Romanis civibus amplior via & occasio patuit in provincias sibi subiectas peregrinandi; civitates præsertim Græcas adeundi, Athenis commorandi, & disciplinas scientiarum, & artium ibidem florescentes in patriam traducendi, factum est, ut Lingua Romana, quæ & Latina frequentius nominatur, ipsius maiestatis particeps in maximum splendoris, puritatis, elegantiae, copiae, nitore, proprietatis, & pulcritudinis fastigium eveheretur; quod circa Augusti Cæsaris tempora evenisse satis compertum est; tuncque insigniores Oratores, Historici, ac Poetæ claruerunt M. Tullius Cicero, M. Terentius Varro, C. Crispus Sallustius, M. Portius Latro, C. Julius Cæsar, Titus Livius, Cornelius Nepos, M. Vitruvius, P. Virgilius Maro, Q. Horatius
Flac-

XIII

Flaccus, P. Ovidius Naso, T. Lucretius Carus, M. Terentius, C. Plautus, Catullus, Tibullus, & Propertius & alii non ignobiles.

Indepost excessum Augusti, cum & Reipublicæ libertas infringi, & Imperium bellis civilibus; atque externis vexari, & convelli, ac in peius ruere cœpisset; cum Romam colluviem quamdam gentium ac nationum ex toto orbe confluentium migrare, ibique commorari datum fuisset; quod maiori frequentia ac ratione accidisse existimandum est post Imperatoris M. Aurelii Antonini, Caracallæ vulgo dicti, indulgentiam, quâ omnes Romani orbis incolæ cives Romani effecti fuerunt; ideoque & ipsis patuit Magistratuum capessendorum; civilium ac militarium munerum gerendorum, immo & ipsius Imperii summum fastigium attingendi, & exercendi ius, consequens fuit, easdem peregrina vocabula, inflexiones, & novos loquendi modos perperam induxisse.

Accesit etiam valde imminuta ab Imperatoribus auctoritas Senatus & Populi
Ro-

XIV

Romani , ex quo defuit apud ipsos perorandi occasio , & libera dicendi consuetudo ; incuria item aut inscitia Principum , aliquorum etiam nimis sæva & tyrannica dominatio , & aliæ satis notæ causæ , quæ Latinam Linguam paulatim à pristino suo candore & elegantia decidere , novamque inducere formam , minus equidem decoram , coegerunt.

Nec diffiteor aliquos extitisse insignes viros , qui primis illis temporibus ipsam sustinere , & contra irruentes stultorum , ignavorum , & novatorum turbas sartam tectam tueri ac conservare conati sunt , ex quorum numero censendi sunt M. & L. Annæus Seneca , Fabius Quintilianus , L. Junius Moderatus Columella , M. Annæus Lucanus , M. Valerius Martialis , Silius Italicus Hispani , C. Cornelius Tacitus , Suetonius Tranquillus , Valerius Flaccus , P. Statius Papinius , Juvenalis , Persius , Claudianus , C. Plinius Secundus maior , & iunior , Quintus Curtius , quibus addicere lubet Ecclesiæ Patres , ac Doctores , qui opera sua eleganti & puriori stylo tradiderunt , in
qui-

quibus Ciprianus , Arnobius , Lactantius Firmianus , Ambrosius , Augustinus , Gregorius , Hieronimus , Paulus Orosius , Aurelius Prudentius , & alii nonnulli.

Sed labefactato iam Romano Imperio, & diuturnis excidii causis maximè laboranti , sub Principibus item penitus imbecillibus constituto accessit irruptio Septentrionalium Gentium , Gothorum scilicet , Wandalorum , Suevorum , Hunnorum , Francorum , Langobardorum; à quibus florentissimæ ipsius provinciæ, immo & Italia , & caput totius Orbis Roma multoties captæ , devastatæ , & maxima hominum , agrorum , urbium , ac omnium rerum strage fœdatæ , affictæ , atque destructæ fuerunt. Hinc nova in Europâ regna emerserunt , in quæ Romanum Imperium scissum ac divisum extitit ; & hæc rerum exitialis conversio maximam ipsi Latinæ Linguae iacturam intulit , cum quisque populus illius corrumpendæ , novaque efformandæ jus sibi arrogasset : hincque ortum duxere Hispanica nostra , quæ *Romanæ* adhuc cog-

nomine insignitur, Gallica, & Italica cum suis profectitiis dialectis.

Omnes hi Septentrionales Populi incursionibus, ac bellicis exercitiis ut plurimum addicti, & ab studiis litterarum alieni parvam aut nullam in his conservandis, aut fovendis curam adhibuisse facile est coniectari; & ex hoc emanasse principio politiores litteras ab Europâ per sæculorum aliquot spatium penitus exulasse, & ipsarum locum bellorum gerendorum rationes, feudorum consuetudines, & exercitationes corporis occupasse, queis vigor animi, roburque augeretur, & alia huiusmodi, de quibus crebra in historiis mentio reperitur.

Accessit etiam in Hispaniâ nostrâ Maurorum irruptio, & occupatio, quæ causam præstitit, ut cum ipsis diutinum bellum pro focus, & aris per fere octingentorum annorum curriculum gereretur, & nostri milites inter armorum strepitum fere semper victuri à litterarum otio maximè abessent.

Advênit tandem tempus, in quo litterarum splendor, & scientiarum ac artium cul-

XVII

cultus iterum elucesceret , & Europæ nostræ antiquus *Sapientis* honos , & cognomen redderetur , cum decimo quinto , & decimo sexto sæculis plurimi sapientissimi , & omnigenæ eruditiónis copiâ referti viri sibi hanc exornandam , illustrandamque provinciam suscepère. Et imprimis huic operi perficiendo maximam præstitere operam Laurentius Valla , Franciscus Philelphus , Aeneas Silvius , qui Pontificatum summum adeptus Pii Secundi nomen cooptavit , Leonardus Aretinus , Hermolaus Barbarus , Angelus Politianus , Paulus Jovius , Joannes Picus Mirandulanus , Carolus Sigonius , Paulus & Aldus Manutius , Janus Parrasius & Petrus Victorius Itali ; item Desiderius Erasmus Batavus , Iustus Lipsius Belga , Guilielmus Budæus Gallus , & Thomas Morus Anglus & alii nonnulli.

-I. In Hispania nostrâ reparator , & restitutor iam fere extinctæ Latinitatis extitit eximius concivis noster Aelius Antonius Nebrissensis , vel ut eum vero ipsius nomine & cognomine exprimam , Antonius

XVIII

nus de Cala Jarana del Ojo, quem concivem nostrum appello, quod Nebrissa oppidum, ubi ipse ortus est, huius nobilissimæ Civitatis tum temporis vicus fuit, & iuxta Jurisconsultorum placitum „ qui ex vico ortus est, eam patriam „ intelligitur habere, cui Reipublicæ „ vicus ille respondet. Hic ergo vir nunquam à nobis debitis laudum præconiis satis extollendus cum animum adiecerit, ut collato maximo beneficio civibus suis gratificaretur, Italiam adiit, & ibi decem annos commoratus, illos in evolvendis auctoribus, consumpsisse testatur, quos iam multis sæculis ab Hispania exules fuisse conquerebatur. Inde in patriam regressus incepto operi peragendo penitus accinctus (ut verbis eius utar) „ nunquam destitit cogitare ratione quâ „ posset tam longè latèque per omnes „ Hispaniæ partes diffusam barbariem „ profligare. Hoc sibi proposito fine Salmanticam petens in ipsius admodum celebri Universitate per duodecim annos duplici stipendio publico designato Latinam Linguam ingenti plausu, atque audien-

audientium profectu edocuit ; quo factum est ut ipsius doctrina verbo & libris editis explanatâ uberrimos fructus ubique propagarit. Hinc ergo Litterarius Orbis suspexit, & admiratus est clarissimos Hispanos nostros Antonium Augustinum, Joannem Ludovicum Vives, Vincentium Marinerium, Benedictum Ariasmontanum, Franciscum Sanctium Brocensem, Ferdinandum Pincianum, Joannem Ludovicum de la Cerda, Melchiorum Canum, Dominicum Sotum, Franciscum Victoriam, Joannem Marianam, Josephum Acostam, Joannem Ginesium Sepulvedam, Alvarum Gometium, Alphonsum Garciam Matamoros, Nicolaum Antonium, Emma-nuelem Martinum, & nonnullos alios, qui operibus in lucem productis ingentem eruditionis, ac ingenii palmam sunt adepti.

Mihi ergo hæc omnia enixè contemplant, & præteritum rerum statum cum præsentis comparanti. maxima animi moestitia, dolorque incessit, quod videam. quâ parentum incuriâ, quâ adol-

les-

lescentium oscitantia, qua professorum ignavia, & aliquorum etiam imperitia Latinae Linguae & humaniorum Litterarum studia penitus abiecta & despectui habita, in deteriore quotidie causam recidere deprehendantur. Scitis equidem, amplissimi Viri, quam frequenter eveniat, adolescentes vix ad hæc studia ingressos, & per unum aut duos annos iisdem operam dantes statim ad alias perdiscendas scientias convolare consuevisse; inde est, ut sermone quodam semilatino utantur, qui & barbarismis & solæcismis plenus esse dignoscitur. Immò & ipsi, qui maiori instructione præditi rectam syntaxin suæ elocutioni adhibere solent, in eum scopulum frequenter impingunt, ut in seligendis vocabulis, usuque eorum sensui antiquorum accomodando, & in phrasibus, loquendique modis efformandis à rectâ viâ aberrare contingat, cum plerumque istos ex peculiaribus Hispanicae Linguae & constructionis formulis deducentes mirum sit quam dissonum, ac dissitum à veræ Latinitatis nitore sensum efficiant.

Hi

Hi omnes certe sententiæ clarissimi Grammatici Pomponii sunt ignari, quâ Tiberium Cæsarem quoddam verbum noviter inducere tentantem libere obiurgavit inquiring. „ Tu Cæsar, Civita- „ tem hominibus dare potes: verba & „ usus Linguae non potes.

Fateor equidem alibi etiam hoc Linguae Latinae & humanioribus Litteris detrimentum accidisse: de eo namque ut in sua Italia emergente olim conquestus fuerat Janus Vincentius Gravina in Epistola ad J. Gabrielem Reginerium, ubi postquam perspicuâ designatione depinxerat mala, & abusus, quos in Latino sermone obversari existimabat sic ait: „ demum Italia bonarum quondam ar- „ tium præsidium, arx doctrinarum, „ fons elegantiae nunc ampullis, ineptiis, & deliriis obruitur. Et cum ipse Auctor in alia epistola ad Emmanuelem Martinum in Latinae Linguae laudes maxime efferatur, non abs re erit, ut vos ita eum eloquentem audiat. „ Voluptas illius est tanta, quantam si Graecam exceperis, aliarum linguarum „ ha-

„ habet nulla. Usque adeo & ornari po-
 „ test, & contrahi modo, modo laxari,
 „ ac ad numerorum, & sententiarum va-
 „ rietatem flecti, & verborum luminibus
 „ mirisque translationibus illustrari:::
 „ Mitto nunc Latini sermonis leporem
 „ & veneres; mitto vocabulorum uber-
 „ tatem, & significationum fœcundita-
 „ tem; mitto particularum, quæ quasi
 „ orationis fibræ sunt, multitudinem,
 „ nexûsque facilitatem, & gratiam:
 „ mitto verborum copiam iam diu ab
 „ antiquissimis scriptoribus ad usum ar-
 „ tium, & doctrinarum comparatio-
 „ nem; mitto elegantiam; mitto ma-
 „ iestatem, & in ipso verborum sono
 „ imperium consulare. Et alia fusius
 quæ apud ipsum reperire licebit.

Ut ergo præsentî damno, & maiori
 in posterum imminenti ruinæ opportu-
 nè, quantum in nobis sit, medellam
 adhibere possimus, ob oculos habeamus
 oportet illud nostri Martialis

Sint Mæcenates, deerunt non Flacce,
 Marones

Virgiliumque tibi vel tua ruradabunt.
 Et

XXIII

Et cum omnibus nobis innotescat, quanta Principis nostri Caroli III. Augustum virtutibus, beneficentiâ & affectione erga sibi subditos populos longè superantis sit scientiarum promovendarum sollicitudo, & plurimis exhibitis testimoniis manifesta protectio, & quomodò per ipsas singulas evagatus Regius eius animus post adlectas in Curiam suam humaniores Musas, ibidemque munificentissimè collocatas in hoc indefessâ curâ, & labore sedulus intendât, ut ipsas deficientes erigat, erectas augeat, & confirmet, omnesque pro dignitate Imperii, civium utilitate, Hispanique nominis gloria foveat, efflorescentes velit, & ardentè exoptet; reliquum est ut & nos, quibus cordi esse debet in idem collimandi desiderium, huiuscemodi vestigiis inhærentes, eaque summâ veneratione prosecuti conatus nostros etiam adiiciamus, quo maiori datum sit vigore, diligentîâ, atque constantîâ ut & exemplis, & suasionibus, & præmiis, quæ iuxta facultates assignari queant, cæteri alliciantur, suasque operas præstent.

tent eidem proposito fini deservituras. Ego sane, accepto muneri satisfactorius, ad id properè, & alacriter peragendum vos hortor, obtestor, & instanter exoro; ac spem animo conceptam habeo meis votis non esse defuturos. Hoc equidem vestro consensu & consilio confirmato, ac munito, & patriæ commodis, atque honori, & Academico nostro Instituto plenius consultum iri censeo, & vos restitutæ sermonis Latini elegantiae indeficientem palmam consequemini.

DIXI.